



大埔客尋根

飛行機个細窗外背，浸在日頭光下个藍，金晶積燼戔都人擘毋開眼，腳下个雲千變萬化，形款各不相同，閃光个白，白去無款，佢懶拐拐托核飛行機行。一點鐘久个航程，看得出大家做下都心躍躍，該毋受管酌个心早都飛到海个該頭去咧！小三通，這係係第一擺體驗，試著已稀罕，原來大陸正經斯在個个隔壁等。海風一陣陣，吹走對金門起勢斯跔上船个熱氣，逐船个海浪，一波接一波，水痕中，佢恁想個个老祖公該央時撐船渡海个心情，係看著希望个歡喜？抑係為著生活个無奈？共樣係過烏水溝，毋過心情應該十分無相同正著。

車對城市駛到莊下，光景乜天差地遠，車肚一聲一聲个讚嘆，係對心肝肚發出來个。看哪！遠遠个矮山坪，圓樓一座過一座接眼過，莫論厥材質、結構、防禦性……，單淨在樹林、草埔項斯打眼都分人相翕無停。幾日个行程，參觀幾下座有名个圓樓、圍龍屋，試試去了解幾下百年前先民个生活、文化，甚至厥等个智慧、想法。佢目珠躡大，尋寶藏个樣滿哪尋、滿哪看，斯驚怕會漏失哪個。腳下个石卵同吾這兜嚟睇厥个歷史，逐埕泥磚、石壁、枋梯礮、屋簷、桁桷，都有佢風神過个蹤跡，屋前、屋肚个古井水到今無斷，毋過人、事既經換朝換代。

讚嘆過先民个建築智慧，當然也愛享受下莊下个悠閒，「橋溪古韻」單淨聽名，斯錫都人腳撓撓咧，確實，講圓樓係老古時代，這位斯係個个還細時節。山路跔溝行，無已證，試著也毋會歪行，歸路遠遠近近、四四散散都有奔瓦个伙房屋。烏疏有歲數个屋瓦、壁扇，分佢恁著風搓時屋肚承雨水个面盆、鑊頭，還過阿姆跋上屋頂補瓦个無奈。該灰灰个壁扇還印核吾等揸密摸時留落來个手跡，今這下，風在吹、樹在搖，伸著回憶。路脣拚緊落山个溝水，清涼涼，捧一捧洗手、洗面，散下大氣，上山个疲瘡跔核斯分清風帶走咧。山頂个水寨係路个盡尾站，洩往下个水沖，大聲唱出山頂个歌，激出來个水花係佢快樂个籽仁，跔風掖到吾等身項，分吾這兜歸身鬆爽。空氣好、景緻像詩又像畫，跋到這逐儕都試著已值，在這熱氣逼人个大暑天時，跔眾人來到這有樹遮蔭、有水好搞、有分人清醒个負離子个好所在，實在係福氣十足！

大埔人轉原鄉，斯像轉妹家樣，歡喜之外還加淦淦个激動心情。原來臍帶相連个親情，不管經過幾多朝、幾多代，人一旦踏到祖公个胞衣跡地，接收著天地同祖公个訊息，跳動个頻率斯合共下咧。恁熱个天時，吾這兜平常時無多交插、無共樣領域个一陣人，大家目標相同轉到原鄉，六日來食共下、寮共下，客人个良善分大家好共下，逐日無分你抑係大家相賽躡悠湯，笑科一齣盤過一齣，笑聲連連、鬧熱濟借。係緣分，將吾這兜人箍共下，勞瀝一路相惜个人，因致有若這兜个相幫相揸，係正有好安心食、放勢寮，同時也長著智識！

作者：劉玉蕉

☆詞彙學習☆

- | | |
|---|--|
| 【金晶積燼】gim ⁺ zia ⁺ zid ⁺ nen ⁺ ：亮晶晶。 | 【壁扇】biag ⁺ shen ⁺ ：牆壁。 |
| 【無款】mo ⁺ kuan ⁺ ：不像樣，有超過之意。 | 【揸密摸】em ⁺ mi ⁺ mia ⁺ ：躲貓貓遊戲。 |
| 【懶拐拐】nan ⁺ guai ⁺ guai ⁺ ：懶洋洋。 | 【捧一捧】bung ⁺ rhid ⁺ bung ⁺ ：雙手掬一把。 |
| 【管酌】guan ⁺ zhog ⁺ ：約束、管教。 | 【籽仁】zii ⁺ rhin ⁺ ：種子。 |
| 【腳撓撓】giog ⁺ niu ⁺ niu ⁺ ：腳底發癢。此處指想去之意。 | 【躡悠湯】nang ⁺ ham ⁺ tong ⁺ ：無稽之談。 |
| | 【交插】gau ⁺ cab ⁺ ：交流來往。 |